



SALA STAMPA DELLA SANTA SEDE  
**BOLLETTINO**

HOLY SEE PRESS OFFICE BUREAU DE PRESSE DU SAINT-SIÈGE PRESSEAMT DES HEILIGEN STUHLIS  
OFICINA DE PRENSA DE LA SANTA SEDE SALA DE IMPRENSA DA SANTA SÉ  
BIURO PRASOWE STOLICY APOSTOLSKIEJ دار الصحافة التابعة للكرسي الرسولي

N. 0194

Sabato 14.04.2007

**LETTERA DEL SANTO PADRE ALL'INVIATO SPECIALE ALLE CELEBRAZIONI DI CHIUSURA  
DEL CENTENARIO DELL'EVANGELIZZAZIONE DEL GHANA SETTENTRIONALE  
(NAVRONGO, 23 APRILE 2007)**

LETTERA DEL SANTO PADRE ALL'INVIATO SPECIALE ALLE CELEBRAZIONI DI CHIUSURA DEL  
CENTENARIO DELL'EVANGELIZZAZIONE DEL GHANA SETTENTRIONALE (NAVRONGO, 23 APRILE 2007)

In data 15 marzo 2007, il Santo Padre ha nominato l'Em.mo Card. Ivan Dias, Prefetto della Congregazione per l'Evangelizzazione dei Popoli, Suo Inviato Speciale alle celebrazioni di chiusura del centenario dell'evangelizzazione del Ghana settentrionale, che avranno luogo a Navrongo il 23 aprile 2007.

La Missione che accompagnerà l'Em.mo Card. Ivan Dias è composta da:

- Rev.do Mons. Roger Aboteyuure, della diocesi di Navrongo-Bolgatanga;
- Rev.do P. Francis Bomamsam, M. Afr., Superiore Provinciale in Ghana ed in Nigeria dei Missionari d'Africa.

Pubblichiamo di seguito la Lettera del Santo Padre al Suo Inviato Speciale:

● **LETTERA DEL SANTO PADRE**

Venerabili Fratri Nostro  
IVANO S.R.E. Cardinali DIAS  
Congregationis pro Gentium Evangelizatione Praefecto

Centenaria recolitur iam memoria ex quo tempore ad septemtrionalem Ganae locum Evangelii nuntius allatus est Dominique salutaria beneficia gentibus illis subministrari coepta sunt, sollertibus operantibus missionariis, scilicet Patribus Albis, qui ex Burkina Fasana regione procedentes, die XXIII mensis Aprilis anno MCMVI primum Navrongi sanctam Missam celebrarunt.

Admodum ideo decet et convenit ut eventus hic congruenter commemoretur et optimo iure extollatur. Celebratio enim haec copiam dat et facultatem non huius rei dumtaxat memoriam repetendi, verum homines ad ferventiorum religionis sensum, firmiorem fidem certioraque proposita, pristinis illis instantibus exemplis, permovendi.

Miserenti igitur favente Domino, evenientis mensis Aprilis XXIII die Navrongi sollemnis erit a primaeva illa evangelizatione centenaria anniversaria commemoratio concludenda, concurrentibus quoque fidelibus circumcirca commorantibus, ut agri hi dominici, inde fere sumentes vim, uberiores fructus fundant et laetiores spiritales commoditates in dies experiantur.

Quocirca ut ritus hic magnificentius efficaciusque evolvatur, Ganensium Episcoporum Conferentiae postulatis libenter occurrentes, mittere aliquem eminentem Praesulem statuimus, qui partes Nostras sustineat et Personam agat. Ad te autem, Venerabilis Frater Noster, cogitationem convertimus, qui, Evangelii inter Nationes diffundendi curator, prorsus idoneus occurris ad ministerium hoc praestandum et luculenter explendum. Itaque permagna moti affectione, te, Venerabilis Frater Noster, **Missum extraordinarium** renuntiamus et constituimus ad celebrationem quam supra diximus agendam.

Universis igitur participibus fidelibusque inibi cunctis mentem Nostram benignam ostendes, cum quamvis longo spatio separemur adsimus spiritu praesentes. Omnibus Nostro nomine Benedictionem Apostolicam impertias volumus, quae sit animorum renovationis signum et futuro de tempore supernarum nuntiatrice gratiarum.

Ex Aedibus Vaticanis, die V mensis Aprilis, anno MMVII, Pontificatus Nostri altero.

BENEDICTUS PP. XVI

[00534-07.02] [Testo originale: Latino]

---